



Äntwert vun der Justizministesch, Elisabeth MARGUE an der Ministesch fir Gläichstellung an Diversitéit, Yuriko BACKES op d'parlamentaresch Fro N°1749 vum 9. Januar 2025 vum Här Deputéierte Sven CLEMENT

Haislech Gewalt ass ee wichtegt Thema, dat huet d'Regierung den 21. Januar 2025 an der Chamber nach eng Kéier an hirer Prise de position am Kader vun der Interpellatioun iwwert d'geschlechterbaséiert Gewalt rappeléiert. Souwuel déi haislech Gewalt wéi déi geschlechterbaséiert Gewalt sinn zu Lëtzebuerg eng Realitéit an eng verstärkte Bekämpfung dovunner ass eng kloer Prioritéit vun dëser Regierung.

Dat däitscht Gewaltschutzgesetz vum 11. Dezember 2001, wat an der parlamentarescher Fro ernimmt gëtt, an dat soll iwwerschaaft ginn, ass zënter 2002 a Kraaft. Et erméiglecht den Affer vu Gewalt am Stot, viru Familljegeriichter Rechtsschutz ze sichen. D'Gesetz gesäit eng Rei Interdictiounen vir, déi d'Gericht fir de Fall prononcéiere kann, wou de Kierper, d'Gesondheet, d'Fräiheet oder déi sexuell Selbstbestëmmung vun enger Persoun verletzt ginn. Zu deenen Interdictiounen zielen ënner anerem de Verbuet d'Wunneng vun der betroffener Persoun ze betrieden, sech an engem bestëmmten Ëmkrees vun der Wunneng vun der betroffener Persoun opzehalen, oder bestëmmten aner Plazen opzesichen, wou sech Persoun reegelméisseg ophält.

Déi aktuell Ännerungsvirschléi vum uewe genannte Gewaltschutzgesetz gesinn eng elektronesch Openthaltsiwwerwaachung vum Täter vir. Familljegeriichter sollen d'Méiglechkeet kréien, eng elektronesch Openthaltsiwwerwaachung unzeuern. D'Täter géifen deemno eng elektronesch Foussfessel kréien. Mat der elektronescher Openthaltsiwwerwaachung sollen Täter dovun ofgehale ginn, géint eng Gewaltschutzuerdnung ze verstoussen. D'elektronesch Openthaltsiwwerwaachung soll awer just an Ausnahmefäll ugewant ginn, an deenen eng konkret Gefor, besonnesch fir d'Liewen an d'Gesondheet vum Affer besteet.

Stand haut, gesäit déi aktuell, lëtzebuergesch Gesetzgebung vir, dass wann eng Persoun eng aner Persoun, mat där si zesummelieft oder zesummegelieft huet, agresséiert oder menacéiert z'agresséieren, de Familljegeriichter, op Ufro vun der betroffener Persoun, verschidde Verbueten ka prononcéieren, ënner anerem de Verbuet, Kontakt mat der Persoun opzehuelen, de Verbuet, Messagen un d'Persoun ze schécken, de Verbuet, un d'Persoun erunzetrieden, oder och de Verbuet, bestëmmte Plazen ze besichen.

Wat déi elektronesch Foussfessel betrëfft, sou ass d'Regierung an enger stänneger Reflexioun fir d'Applikatioun vum elektroneschem Iwwerwaachungssystem um Terrain ze verbessern an et als eng Alternativ zur Prisonsstrof ze fërderen, souwéi dat an der Äntwert op déi parlamentaresch Fro Nr. 1704 vum 20. Dezember 2024 iwwert d'Placement ënner elektronesch Iwwerwaachung erkläert ass. Wat speziell déi haislech Gewalt ugeet, ass d'Analys amgaang, fir e Gebrauch vun der elektronescher Foussfessel a Fäll vun haislecher Gewalt kënnen z'erméiglechen.



Déi aktuell lëtzebuergesch Gesetzgebung gëtt e gudden Kader fir d'haislech Gewalt ze poursuivéieren an ze bestrofen. Dat modifizéiert Gesetz iwwer haislech Gewalt vum 8. September 2003 definéiert d'Interventiounsketten, déi am Fall vun haislecher Gewalt ugewant gëtt. Am Kader vun dësem Gesetz gouf och en "Comité de Coopération entre les professionnels dans le domaine de la lutte contre la violence" agefouert, deen, nieft der Erhiewung vu Statistiken an der Iwwerwaachung vun der Ëmsetzung vum Gesetz, och eng Plattform bitt, fir e regelméissegen Austausch tëschent de wichtegsten Acteuren aus der Interventiounsketten, wéi der Police, dem Parquet, de Ministère an den operationelle Partner z'erméiglechen. Dat schléisst awer net aus, dass punktuell Upassungen oder Nobesserunge gemaach kënnen ginn. Den Usproch vun der Regierung ass et dësen Dispositif kontinuéierlech auszubauen, fir dem Besoin vun den Affer gerecht ze ginn, hire Schutz ze garantéieren an d'Responsabiliséierung grad ewéi d'Sanktioun vun den Täter ze schäerfen.

Am Kampf géint déi verschidde Formen vu Gewalt schafft d'Regierung, zesumme mat senger sëllege Partner, deemno un enger multidimensionaler a genderneutraler Approche aus Afferschutz, Täteraarbecht a Sensibiliséierungsmesuren. Et besteet haut schon e ganz accessibelen Hëllefseisen an en Dispositif, deen der Diversitéit vun eiser Gesellschaft gerecht gëtt.

Am Kontext vum Kampf géint haislech a geschlechterbaséiert Gewalt schafft de Ministère fir Gläichstellung an Diversitéit (MEGA), ënnert anerem mam Justizministère an dem Inneministère, am Moment och zesummen un der Ëmsetzung vun zwee ganz wichtige Projete aus dem Regierungsprogramm, déi dëser Zilsetzung Rechnung droen:

- engem Nationalen Aktiounsplan iwwer geschlechterbaséiert Gewalt, deen den nationalen Dispositif op verschiddene Niveaue stärke wäert: niewent der Prise en Charge vun Affer an der Responsabiliséierung vun den Täter sollen och d'Beräicher Formatioun, Legislatioun, Statistik a Fuerschung ausgebaut ginn.

Am Kader vun den éischten Assisen iwwer d'geschlechterbaséiert Gewalt, déi den 20. Januar vum MEGA organiséiert goufen, si Piste beschwat ginn, op déi sech déi global Regierungsstrategie konzentréiere soll am Kampf géint déi verschidde Formen vu geschlechterbaséierter Gewalt. An deenen eenzelnen Ateliere matt 120 Experten aus 60 Organisatiounen, goufen éischt Pisten identifizéiert, déi mir matt eisen operationellen a ministerielle Partner, der Zivilgesellschaft an aneren Acteuren ëmsetze wäerte fir eise gesetzleche Kader, den Afferschutz, Täteraarbecht, d'Formatiounsoffer a ganz generell eisen Hëllefseisen ze stäerken.

- enger nationaler Ulaftell fir all Affer vu Gewalteng Ënnerstëtzung, sief et en Accueil, eng Reorientatioun oder eng Prise en Charge urgente ze bidden.

D'Zilsetzung vun engem « Centre National pour Victimes de Violences » (CNVV) ass d'Schafung vun engem Genre « Guichet Unique », wou en Affer op enger Plaz an op senger Demande hin eng breet an zentraliséiert Hëllefsoffer kritt an dat a véier Voleten: medezinesch, polizeilech, juristesch a psychosozial.



Dës Struktur stellt de Besoin vum Affer an de Vierdergrond a funktionéiert komplementar zum bestoenden Dispositif. Dës Offer handelt an der Urgence an stellt sécher, datt d'Affer duerno u spezialiséiert Structure weidergeleet gëtt fir den adequate Suivi ze garantéieren. No enger éischer Pilotphase soll den CNVV spéider eng Prise en charge 24/7 assuréieren.

Lëtzebuerg, den 12. Februar 2025.

D' Justizministesch

(s.) Elisabeth Margue